

Order of Saint Lazarus: Primary sources

Pope Gregory XV: Bullae Papae Gregory XV: Romanus Pontifex ex sua circumspecta providentia..... dated March 1620 setting up the Order of our Lady of Mount Carmel

- Transcribed in: Laerzio Cherubini, Angelo Maria Cherubino. Magnum bullarium romanum, a Clemente VII vsque ad Gregorium XV. P. Borde, L. Arnaud & C.I. Rigaud, Lyon, 1655, vol.3, p.372-376
- Transcribed in Pièces Justificatives [doc. no. 33] in Gautier de Sibert. Histoire des Ordres Royaux, Hospitaliers-Militaires de Notre-Dame du Mont Carmel et de Saint-Lazare de Jérusalem. Imprimerie Royale, Paris, 1772

lxxiv

Pièces justificatives.

N.° 33.

*BULLES du pape Paul V, pour l'institution de l'Ordre
de Notre-Dame du Mont-Carmel.*

PAULUS PAPA V.

Ad perpetuam rei memoriam.

ROMANUS Pontifex, cujus principatum super omnes extulit Divina Majestas, piis devotorum & suis obsequentissimorum filiorum votis, qui majorum suorum quam sumillimi evadere, & quam nobilitatem a majoribus acceperunt, eandem posteris suis insigni aliqua accessione cumulata tradere cupiunt, libenter annuit; & quæ ad id, ac ad Fidem Catholicam factam tectamque tuendam, & illius inimicos propulsandos, salutemque animarum procurandam tendere dignoscuntur, concedit, prout conspicit in Domino salubriter expedire.

§. I. Exposuit siquidem nobis nuper dilectus filius nobilis vir Carolus de Neufville, Dominus in temporalibus d'Halincourt, & Eques utriusque ordinis Regii, nomine charissimi in Christo filii nostri Henrici Francorum Regis Christianissimi, cujus ipse ad nos Sedemque Apostolicam orator existit, quod ipse Henricus Rex, pro singulari quo etiam uti dictæ Sedis Apostolicæ filius primogenitus, tuendæ & propagandæ, augendæque Religionis Catholicæ desiderio fervet, ad Sanctæ Romanæ Ecclesiæ exaltationem & profectum, hæresumque extirpationem, & hæreticorum depressionem, aliaque jam diu & usque a primordio ejus feliciter suscepti Francorum regni, in eodem regno & aliis ditioni suæ subjectis locis consuevit adhibere remedia. Quare unam Militiam seu Ordinem militarem ad ipsius Henrici Regis arbitrium competenter de suis

Pièces justificatives.

lxxv

bonis mere laicalibus (non tamen beneficialibus seu redditibus ecclesiasticis) dotandam seu dotandum ex delectis Gallicanæ nationis viris nobilibus & ingenue natis, sub denominatione seu titulo ac regula gloriosissimæ semperque Virginis Dei genitricis Mariæ de Monte-Carmelo, quam prædictus Henricus Rex sui protectricem & advocatam singulari devotione semper habet ac veneratur, sub nostro & dictæ Sedis beneplacito & auctoritate erigi & institui summopere desiderat, dictusque Carolus nomine ipsius Henrici Regis nobis humiliter supplicavit, quatenus eundem Henricum Regem specialibus favoribus & gratiis prosequi, aliasque in præmissis opportune providere, de benignitate apostolica dignaremur.

§. II. Nos igitur hoc pium & nunquam satis laudandum desiderium promovere cupientes, ac dictum Henricum Regem à quibusvis excommunicationis, suspensionis & interdicti, aliisque ecclesiasticis sententiis, censuris & pœnis, a jure vel ab homine quavis occasione vel causa latis, si quibus quomodolibet innodatus existit, ad effectum præsentium dumtaxat consequendum, harum serie absolventes & absolutum fore censentes, hujusmodi supplicationibus inclinati, Militiam seu Ordinem hujusmodi sub eadem regula, cujus Militiæ suprema vel principalis sedes & conventus ad id per dictum Henricum Regem in ipso Franciæ regno, seu alio ab eodem Henrico Rege possessio dominio consistente loco assignandus & statuendus existat, & esse debeat; ac in Militia seu Ordine hujusmodi, unum Magistrum Magnum vocandum supremam seu principalem illius dignitatem pro uno Magistro Magno vocando, qui ejusdem Militiæ vel Ordinis caput & supremus sit, cum conventu per dictum Henricum regem (sine alicujus præjudicio) constituendo; necnon militum seu ministrorum numero eidem Magistro bene viso. Qui Magister & milites cum una, & ea deffuncta, cum altera muliere, etiam vidua, dumtaxat matrimonium contrahere possint, & alias ipsi castitatem conjugalem & obedientiam

k ij

lxxvj

Pièces justificatives.

expresse profiteantur, cum signo ejusdem beatæ Mariæ Virginis, & habitu ab aliis aliarum Militiarum signis omnino diversis & dissimilibus non immutandis, ac mensa magistrali, prioratibus, præceptoris, aliisque beneficiis & officiis, de bonis mere laicalibus, non tamen beneficalibus seu ex redditibus ecclesiasticis, ut præfertur, dotandis, ex nunc prout ex tunc & e contra, postquam Militia seu Ordo hujusmodi competenter, ut præfertur, dotata vel dotatus fuerit, apostolica auctoritate, tenore præsentium perpetuo, & sine alicujus præjudicio erigimus & instituimus.

§. III. Ita quod dicti Magistratus etiam a primæva illius erectione & institutione vacantis, & de cætero perpetuis futuris temporibus, quotiescumque illum quovis modo, & ex cujuscumque & qualitercumque qualificata persona, etiam apud sedem prædictam, aut alias quocumque tempore aut quandocumque vacare contigerit, provisio & omnimoda dispositio ad dictum Henricum, & pro tempore existentem Francorum regem, perpetuo spectet & pertineat, spectareque & pertinere debeat.

§. IV. Et tam hac prima vice quam quotiescumque alia ejusdem Magistratus vacantia evenerit, quicumque de eo per dictum Regem provisus fuerit, ut præfertur, post provisionem hujusmodi factam intra très menses & nunc proximos, novam desuper ab eadem Sede provisionem seu confirmationem petere & impetrare, ac Fidei Catholicæ professionem juxta articulos a dicta Sede traditos emittere, illamque sic emissam & ab eodem Magno Magistro manu sua subscriptam ad eandem Sedem intra eosdem tres menses transmittere debeat & teneatur; cum eo tamen quod dictus Magnus Magister in regimine & administratione dictæ Militiæ, nisi post obtentam novam provisionem & emissionem professionis hujusmodi, se nequeat intromittere. Necnon prædictæ erectæ Militiæ dotem per dictum Henricum Regem de suis bonis mere laicalibus, non tamen

Pièces justificatives.

lxxvij

ecclesiasticis, ut præfertur, dotandæ etiam perpetuo concedimus & applicamus.

§. V. Ac insuper pro tempore existenti Magno Magistro hujusmodi, ut supremam seu principalem ejusdem Militiæ vel Ordinis sedem post hanc primam vicem ad quemcumque locum, etiam maritimum, in regno seu locis per eundem Regem possessis, de licentia tamen ejusdem Sedis Apostolicæ transferre & collocare, ac milites creare qui eandem fidem profiteri, & fidelitatis juramentum tam Romano Pontifici, quam dicto Magno Magistro, præstare etiam teneantur & debeant.

§. VI. Stabilimenta quoque, statuta & ordinationes Militiæ seu Ordinis hujusmodi, illiusque prosperum regimen concernentia, a Sede Apostolica prædicta approbanda, condere, ac condita pro temporum & rerum qualitate, si opus fuerit, mutare, & alia de novo edere, dummodo licita & honesta sint, ac sacris Canonibus & præsertim Decretis Concilii Tridentini ac Constitutionibus Apostolicis non contraria, eisdem auctoritate & tenore concedimus.

§. VII. Necnon prædicto Magno Magistro ut perpetuis futuris temporibus per se ipsum dumtaxat & non alium, juxta stabilimenta & decreta prædicta, de omnibus & singulis prioratibus, præceptoribus & membris, cæterisque beneficiis ecclesiasticis ejusdem Militiæ seu Ordinis, ut præfertur, erectæ seu erecti, qui pro tempore qualitercumque & ex quorumcumque personis, etiam quamcumque reservationem inducentibus, ubique, etiam apud Sedem Apostolicam prædictam vacaverint, militibus & personis dicti Ordinis providere possit.

§. VIII. Prioribus vero & Præceptoribus ac Capellanis Militiæ seu Ordinis hujusmodi, habito & obtento sui Magistri consensu, ac licentia & approbatione a locorum ordinariis, in Ecclesiis etiam Militiæ missas celebrare, necnon quibuscumque militibus & personis Militiæ seu Ordinis hujusmodi, Extremæ-unctionis, aliaque

Lxxviii

Pièces justificatives.

ecclesiastica sacramenta, etiam in mortis articulo, & omni tempore, (sine tamen parochialium ecclesiarum & illarum Rectorum præjudicio) administrare, & eorum confessiones prævia ordinariorum approbatione audire, & illos in forma Ecclesiæ consueta, imposita pœnitentia saluari, absolvere.

§. IX. Magistro autem ac militibus, presbyteris ac capellanis prædictis, eorumque singulis, tam clericis quam laïcis, etiam uxoratis & bigamis (non tamen trigamis) ut unam vel plures pensiones annuas, Magistro videlicet, usque ad mille quingentorum, cæteris vero militibus prædictis ad quingentorum ducatorum auri de Camera summas super Cathedralium, etiam Metropolitanarum, & aliarum Ecclesiarum, necnon Monasteriorum etiam Consistorialium, Prioratum, Canonicatum, etiam Præbendarum, dignitatum, personatum, administrationum, & officiorum, aliorumque beneficiorum ecclesiasticorum cum cura & sine cura animarum, sæcularium & quorumvis Ordinum regularium, qualitercumque qualificatorum, in dominiis per dictum Regem possessis dumtaxat consistentium, fructibus, redditibus & proventibus, juribus & emolumentis universis, ac etiam distributionibus quotidianis, eis apostolica auctoritate reservatas & reservandas; vel loco pensionum annuarum hujusmodi, omnia & singula fructus, redditus & proventus, jura, obventiones & emolumenta ac distributiones hujusmodi sibi usque ad dictam summam; ut præfertur, reservata & reservanda, etiamsi post illarum vel illorum reservationem uxorem duxerint, & matrimonium contraxerint, ac etiam, ut præfertur, bigami (non tamen trigami) & ultra, dictoque matrimonio constante ad eorum vitam, una cum quibusvis præceptoriiis & aliis beneficiis dictæ Militiæ percipere, exigere & levare, & in suos usus & utilitatem convertere, libere & licite valeant, eisdem auctoritate & tenore, de speciali gratia etiam indulgemus, ac desuper cum eisdem Magistro & militibus, ac eorum singulis, dispensamus.

Pièces justificatives.

lxxix

§. X. Præterea Militiam prædictam, illiusque milites, res & bona, a quibusvis exemptionibus, quartis, mediis, & aliis quibuscumque gravaminibus impositis, & quandocumque imponendis, ac superioritate quorumcumque ordinariorum etiam perpetuo eximimus & liberamus, illaque omnimodo jurisdictioni, superioritati & obedientiæ dicti Magistri subijcimus & supponimus.

§. XI. Postremo ad augendam Christi fidelium devotionem & animarum salutem procurandam, de omnipotentis Dei misericordia, ac beatorum Petri & Pauli Apostolorum auctoritate confisi, Magistro, militibus & aliis personis prædictis, vere pœnitentibus & confessis, ac sacra communione refectis, tam in die qua in dicta Militia seu Ordine recepti fuerint, & in ea seu eo professionem emiserint, quam singulis annis in festo ejusdem beatæ Mariæ Virginis de Monte-Carmelo, die decima sexta julii celebrari solito, a primis vesperis usque ad occasum solis ejusdem festi, & etiam in eorum mortis articulo saltem contritis, ac nomen Jesu corde, si ore nequiverint, invocantibus, plenariam omnium peccatorum suorum indulgentiam & remissionem dicta apostolica auctoritate earundem tenore præsentium misericorditer in Domino eis perpétuo concedimus & elargimur.

§. XII. Quocirca dilectis filii Anicien. & Damascen. ac Parisien. officialibus, per apostolica scripta mandamus, quatenus ipsi vel duo aut unus eorum, per se vel alium seu alios faciant auctoritate nostra, præsentis Litteras, & in eis contenta, ubi & quando opus fuerit, publicari, & ab omnibus ad quos spectat & spectabit in futurum firmiter observari, non permittentes milites prædictos desuper à quoquam quomodolibet molestari, contradictores quoslibet & rebelles, ac præmissis non parentes, per sententias, censuras & pœnas ecclesiasticas, aliaque opportuna juris & facti remedia, appellatione postposita compescendo.

§. XIII. Non obstantibus constitutionibus & ordinationibus

.lxxx

Pièces justificatives.

apostolicis ac Ecclesiarum prædictarum juramento, confirmatione apostolica vel quavis firmitate alia roboratis, statutis & consuetudinibus, privilegiis quoque, indultis & litteris apostolicis, illis illarumque præsulibus, capitulis, conventibus, superioribus & personis sub quibuscumque tenoribus & formis, ac cum quibusvis clausulis & decretis, in contrarium quomodolibet concessis; quibus omnibus, etiamsi de illis illorumque totis tenoribus, specialis, specifica, expressa ac individua, non autem per clausulas generales idem importantes, mentio seu quævis alia expressio habenda foret, illis alias in suo robore permanfuris, hac vice dumtaxat specialiter & expresse derogamus, & contrariis quibuscumque, aut si aliquibus communiter vel divisim ab Apostolica sit Sede prædicta indultum, quod interdici, suspendi vel excommunicari non possint per Litteras apostolicas, non facientes plenam & expressam, ac de verbo ad verbum, de indulto hujusmodi mentionem.

§. XIV. Nulli, &c. Si quis autem hoc attentare præsumpserit, indignationem omnipotentis Dei, ac beatorum Petri & Pauli Apostolorum ejus se noverit incursum.

Dat. Romæ apud Sanctum Marcum, anno incarnationis Domini millesimo sexcentesimo septimo, decimo quarto kal. martii, Pont. nostri anno tertio.

REGULÆ SEU ORDINATIONES PONTIFICIÆ.

PAULUS PAPA V.

Ad perpetuam rei memoriam.

MILITANTIUM Ordinum institutio reipublicæ Christianæ, utilis, & Catholicæ Fidei tutelæ & propagationi proficua futura esse dignoscitur, si certæ regulæ præscribantur, sub quarum felici auspicio & regimine, Militiis hujusmodi nomen daturi, & recte vivere, & Catholici nominis hostes debellare valeant.

§. I.

Pièces justificatives.

lxxxj

§. I. Hinc est, quod nos qui nuper piis carissimi in Christo filii nostri Henrici Francorum Regis Christianissimi nomine supplicationibus nobis humiliter porrectis inclinati, ad omnipotentis Dei & ejus gloriosissimæ Matris Virginis Mariæ gloriam, & Sanctæ Romanæ Ecclesiæ exaltationem, hæresumque extirpationem, & hæreticorum depressionem, Militiam ex delectis Gallicanæ nationis viris nobiles & ingenue natis, sub denominatione seu titulo, ac regula ejusdem gloriosissimæ semper Virginis Dei genitricis Mariæ de Monte-Carmelo, ereximus & instituimus; cupientes ut illa piis & opportunis regulis ordinata & innixa, religioso gradu jugiter & feliciter incedat; ejusdem Henrici Regis nomine nobis humiliter porrectis precibus annuentes.

§. II. Quod perpetuis futuris temporibus dictæ Militiæ milites Fidei professionem juxta articulos, tempore felicitis recordationis Pii Papæ IV prædecessoris nostri, a Sede Apostolica propositos & approbatos, in manibus Magni Magistri ejusdem Militiæ seu ab eo deputandi, emittere, illamque manu propria subscriptam, ei qui curam archivii ipsius Militiæ habebit, consignare.

§. III. Eoque die quo habitum militare suscipiunt, ante illius susceptionem, peccata sua sacramentaliter confiteri, & sanctissimum Eucharistiæ sacramentum sumere.

§. IV. Necnon pallio crucem fulvi seu impluviati coloris, imaginem dictæ Virginis Mariæ in medio habentem gestare, aliam quoque crucem auream, cui ab utroque latere ejusdem gloriosissimæ Virginis imago sit, sericea ejusdem coloris e collo pendentem deferre.

§. V. Insuper Deo & eidem gloriosissimæ Virgini Matri Mariæ, & dictæ Militiæ Magno Magistro, juxta tenorem prædictæ erectionis creato, obedientiæ & castitatis conjugalis vota emittere.

§. VI. Ac quotiescumque a nobis & Sede Apostolica, aut

l

lxxxij

Pièces justificatives.

Francorum Rege Christianissimo pro tempore existente, prædicto Magno Magistro præcipietur, contra Romanæ Ecclesiæ hostes pugnare.

§. VII. Ad hæc singulis diebus officium Beatæ Mariæ seu coronam, quanta majori poterit devotione, recitare.

§. VIII. Festis quoque, & legitime non impediti Sabbati diebus, sacrum Missæ sacrificium audire.

§. IX. Necnon feria tertia cujusslibet hebdomadæ ab esu carniū abstinere.

§. X. Quolibet vero ipsius gloriosissimæ Virginis Mariæ festivitatis die, & præcipue de Monte-Carmelo, quæ die 16 julii celebrari solet, peccata sua sacramentaliter confiteri, & sanctissimum Eucharistiæ sacramentum sumere.

§. XI. Eodemque die festivitatis Beatæ Mariæ de Monte-Carmelo, in locum per dictum Magnum Magistrum designandum ad devote celebrandam hujusmodi festivitatem, simul congregari.

§. XII. Denique ratione commendarum, quæ juxta tenorem erectionis prædictæ fundabuntur, quasque obtinebunt, solita jura & responsiones ærario dictæ Militiæ, prout aliarum Militiarum milites persolvere solent, etiam solvere debeant & teneantur.

§. XIII. Quia vero, ex Francorum Regis Christianissimi subditis dictæ Militiæ milites juxta prædictæ erectionis tenorem esse debent, sub quibuscumque ducibus absque expressa dicti Magni Magistri licentia, sub pœna privationis habitus dictæ Militiæ nullo modo militare possint, perpetuo statuimus & ordinamus, sicque a militibus prædictis observari præcipimus & mandamus.

§. XIV. Nonobstantibus constitutionibus & ordinationibus Apostolicis, cæterisque contrariis quibuscumque.

Datum Romæ apud Sanctum Petrum, die vigesima sexta

Pièces justificatives.

lxxxiiij

februarii, anno Incarnationis Dominicæ millesimo sexcentesimo octavo, Pontif. nostri anno tertio.

Collationné par nous Écuyer, Conseiller-Secrétaire du Roi, Maison, Couronne de France & de ses finances. Signé DOMILLIERS.